

# Da Calvin al federalissem

## Ragischs religiusas dal dretg a l'indipendenza

DA GUIU SOBIELA-CAANITZ

■ **Pertge è la Svizra independenta? Quai para oz evident. Ma in'egliada sin la carta fisica da l'Europa mussa regiuns che paressan predestinadas per ina tala ventira ed èn oz mo pli parts da stadis pli u main unitars.** Per

exempel la Bretagna (27 208 km<sup>2</sup>), penisla tranter l'Atlantic ed il Chanal da la Mongia. Ubain la Liguria (5416 km<sup>2</sup>), tranter la mar e las Apenninas. Ubain in'insla sco la Sicilia (25 832 km<sup>2</sup>). Ma pertge gist la Svizra (41 291 km<sup>2</sup>) amez tantas muntognas? Ha'la simplamain gì cletg? Differents facturs istorics decleran quai; mo la giurisprudenza ha chattà or in motiv spiertal ch'ins emblida savens e ch'ha gidà er a l'indipendenza dals Stadis Unids. Già la teologia calvinistica a l'entschatta dal 17avel tschientaner, en Germania sco er a Basilea e Genevra, punctuava la suveranità da las cuminanzas già existentas. In represchentant prominent da quella scola giuridica è stà Johannes Althusius (1557–1639), naschì a Diedenhausen (Vestfalia), docter da l'Universitad da Basilea e rectur 1599/1600 da la scola auta («Pädagogium») a Siegen (Vestfalia) e puspè 1602 da lezza scola auta stabilida a Herborn (Hessen). Quella persvasiun dal calvinissem europeic ha manà 1648 a l'indipendenza da las Provinzas Unidas dals Pajais Bass e lura dals

Tredesch Pajais svizzers. Johann Rudolf Wettstein (1594–1666), burgamester da Basilea ed ambassadur da la Svizra, ha supplitgà cun success l'imperatur Ferdinand «da laschar star la confederaziun tar sia situaziun e derivanza libra e suverana» (1).

### Dals 4 da fanadur 1776 ad oz

Lur èn vegnidas las tredesch colonias englaisas da l'autra vart da l'Atlantic. «Lezzas dumbraivan passa dus milliuns olmas il 1770 (...). Là devi reformads da mintga sort: Presbiterians, reformads tudestgs, 'quakers', (...) metodists, baptists, reformads olandais ed ughenots franzos (...). Ils colonists americans n'eran betg represchentads al parlament britannic e na respectavan pli sias lescas (...). Ils 4 da fanadur 1776 ha lur 'Congress' vuschà la decleraziun unilateral d'indipendenza dals Stadis Unids» (2). La «NZZ» da l'emprim da december deditgescha ina pagina ad Althusius: «Als Stadis Unids vala lez enfin oz sco in pionier dal federalissem ch'ha formulà ideas fundamentalas da quel pajais. Il princip d'Althusius davart la construcziun da l'urden politic da sustensi ha influenzà ils babs da la Constituziun dals USA, nua ch'ins stima sia 'Politica' anc adina sco ovra politologica classica» (3). L'essai concluda: «Ins ha rescuvri Althusius, ins studegia puspè sia 'Politica', ins fa endament l'entschat-

ta dals otganta onns da guerra [tranter la Castiglia ed ils Pajais Bass 1568–1648]. Tut quai n'è betg mo interessant dal puntg da vista istoric. I pudess mussar la via al management da crisas acutas sco la smanatscha da secessiun da la Catalogna [32 191 km<sup>2</sup>, 7 555 830 olmas] davent dal stadi spagnol (...): Ina regenza centrala permalada che crai da posseder tut ils dretgs da suveranità e repar-tats dretgs d'autonomia a la regiun vegn confruntada cun ina provinza vilentada che pretenda ses dretg da subject suveran aifer structuras federalas» (v. nota 3). Significativa è la derivanza calvinistica. L'autur da questas lingias sto far endament ses ami piemontais barmier Tavo Burat (1932–2009), militant per ils dretgs da tut las minoritads etnicas en Italia, dals Guaisers da la Val d'Aosta als Albanais dal Mezzogiorno. En ses davos onns da vita era Burat predicatur da la baselgia evangelica valdaisa, la pli antica communitad reformada da l'Italia.

**1. Città en: Thomas Maissen, Geschichte der Schweiz. Baden/AG (quarta ediziun, ISBN 978-3-03919-174-1) 2012, p. 124. Wettstein era già ambassadur d'otg pajais reformads (AR, BE, BS, GL, SH e ZH) sco era da las citads da Bienna e Son Gagl dapi 1646.**

**2. Marcel Dorigny et alii, Grand Atlas des empires coloniaux. Paris (Autrement, ISBN 978274742406) 2015, pp. 56–57 e 86.**

**3. Christiane Bender e Hans Grassl, Vom Calvinismus zum Föderalissem, en: «NZZ», 1-12-2018, p. 51.**